

PROGRAMA NASIONAL DEZENVOLVIMENTO SUKU

07 April 2014, Dili, Timor Leste
Komunikadu Imprensa

Headlines : Governo Timor Leste liu husi Ministerio da Administrasaun Estatal Asina Akordo ho Governu Australia hodi Apoiu Programa Nasional Dezenvolvimentu Suku (PNDS).

Iha loron Quarta feira semana ne'e (07/05/2014) Ministerio da Administrasaun Estatal representa Governo Timor Leste liu husi Diresaun Geral Dezenvolvimentu Lokal (DGDL) sei halo asina akordu hamutuk ho Governu Australia kona ba **Akordo Subsidiario** ba apoiu Programa Nasional Dezenvolvimentu Suku iha Timor Leste

Programa Nasional Dezenvolvimento Suco hanesan programa Governo Timor Leste nian, nebe lidera husi Ministerio da Administrasaun Estatal ho Ministerio Finanzas inklui mos Ministerio sira seluk oin sa atu fo kbi'it ba comunidades sira atu deside no dezenvolve rasik infraestrutura bazicas ho skalaun ki'ik iha sira nia Suku. Entretantu Governo Timor Leste iha komitmentu hodi aloka orsamentu **US\$294.3** miliaun ba programa PNDS durante periodu tinan 8, bazeia ba rezolusaun Governo No. 1/2012,

Programa PNDS implementa fazeadamente, iha fulan Maiu 2013 hahu implementa pilotu iha Suku 30, Faze primeiro implementa iha fulan Otubro 2013 ba Suku 149, Faze segundu implementa iha fulan Febreiro 2014 ba iha Suku 91, no Faze terseiru sei implementa iha fulan Agostu 2014 ba Suku 202, katak antes tama iha fim de 2014 Suku 442 implementa ona PNDS.

Progressu implementasaun PNDS iha Suku lao ho Sucsesu. Iha Suku pilotu progressu konstrusaun fizikamente atu besik atiniji ona pursentu 100 no agora daudaun Suku balun tama iha enkontru akontabilidade final, no Suku balun seluk remata ona enkontru akontabilidade final hodi informa ba comunidade kona ba progressu ezeekusaun orsamentu Suku nebe iha. Faze primeru progressu to'o ona iha deside prioridade halo dezenho no asina akordu ba implementsaun Projetu iha Suku, Faze segundu progressu tama ona iha formasaun ba ekipa jestor Suku hodi dezenvolve abilidade ekipa jestaun Suku ninian oin sa atu jere ho diak orsamentu no programa PNDS nebe tama iha Suku ida-idak.

Governo Australia servisu hamutuk ho Governo Timor Leste kleur ona inklui apoiu ba kriaun PNDS iha 2011 to'o 2014, apoiu hirak ne'e mak hanesan :

- Asesor sira ne'ebé finansiada hosi Austrália serbisu hamutuk ho Ministériu Administrasaun Estatal, Ministériu Finanzas no Komisaun Funsan Públiku atu dezenvolve no haforsa sistema korporativu ne'ebé fó dalan ba PNDS atu aloka subsidiu ba Suku, no hametin katak programa ne'e la'o di'ak. Ida-ne'e inklui sistema finansas, jestaun ba rekursu umanu, planeamentu serbisu, lojística no jestaun informasaun.
- Iha tinan 2013, serbisu hela ho organizasaun prestador treinamentu Timorense sira, Austrália facilita treinamentu ba ema 400 resin, no ema hirak ne'e barak serbisu ona nu'udar facilitador sub-distritu Tékniku, Sosial no Finanseiru ba PNDS. Iha tinan 2014 Austrália sei fornese akompanamentu serbisu no treinamentu ba pesoal PNDS sira iha distritu hotu-hotu hodi apoia sira-nia serbisu ho comunidade sira.
- Austrália no Timor-Leste mós serbisu hamutuk hodi harii sistema monitorizasaun no avaliasaun ba PNDS. Austrália sei fó finansas ba Banku Mundiál no Fundasaun Ázia hodi kolekta informasaun kona-ba PNDS ne'ebé bele tulun Governu Timor-Leste atu halo desizaun sira oin sá atu bele hadi'ak programa ne'e bá beibeik.

Ho rejultado nebe diak iha implementasaun PNDS, Governo Australia fo nia komitmentu atu apoiu nafatin implementasaun programa PNDS to'o 2017. Total valor orsamentu nebé apoiu husi Governo Australia ne'e nia montante **AU\$45** miliaun. Asina akordu ohin loke tan possibilidade atu apoiu ne'e bele to'o 2020, depende ba aprovasaun husi Parlamentu Nasional Australia ninian.

Contact : Duarte dos Santos, Chefe Komunikasaun PNDS
E-mail : media@pnds.gov.tl
Phone No : +670 781 88 336